



AMARAN!

Pihak Jabatan Agama Islam Perak tidak bertanggungjawab terhadap sebarang penambahan ayat selain kandungan khutbah yang dikeluarkan.

"MENJAGA ALAM SEKITAR SUATU IBADAH"

5 Jun 2026 / 19 Zulhijah 1447

إِنَّ الْحَمْدَ لِلَّهِ¹، نَحْمَدُهُ وَنَسْتَعِينُهُ وَنَسْتَغْفِرُهُ، وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ، وَمَنْ يُضِلَّهُ فَلَا هَادِيَ لَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ²، وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ³، أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dirahmati Illahi

Marilah kita meningkatkan ketakwaan ke hadrat Allah SWT; sesungguhnya ketakwaan itu menjadikan kita insan berilmu, ditinggikan darjat, seterusnya mendapat keampunan dan kemuliaan di sisi Allah SWT. Sempena sambutan Hari Alam Sekitar Sedunia pada 5 Jun, mimbar akan menyampaikan khutbah bertajuk:

"MENJAGA ALAM SEKITAR SUATU IBADAH"

Sebahagian manusia beranggapan, ibadah terbatas dalam bentuk solat, puasa, zakat, haji, sedekah, infak dan zikir; sedangkan hakikatnya, ibadah dalam Islam merangkumi perkara-perkara yang lebih luas. Setiap perbuatan dengan niat kerana Allah, demi membawa manfaat serta menjauhi kemudaratan, merupakan ibadah.

Sesungguhnya manusia dan alam tidak dapat dipisahkan. Alam ialah tempat manusia hidup, mencari rezeki dan beribadah. Air sungai dan air hujan yang kita gunakan untuk berwuduk, serta udara yang kita sedut, adalah antara nikmat kurniaan Illahi yang sering kali tidak dihargai oleh manusia. Hutan pula berperanan sebagai benteng keseimbangan bumi dan sumber hidupan liar.

¹ Memuji Allah

² Selawat ke atas Nabi Muhammad SAW

³ Pesan Taqwa



Oleh itu menjaga kebersihan sungai, tidak mencemarkan udara dan memelihara hutan dan hidupan liar adalah sebahagian daripada ibadah yang akan dipersoalkan oleh Allah SWT.

Manusia akan menanggung derita apabila air sungai dikotori, udara tercemar, dan bumi dirosakkan. Insafilah, memelihara alam sekitar sebenarnya bermaksud memelihara kehidupan manusia dan menjaga syarat kesempurnaan ibadah kepada Allah SWT.

Jemaah yang dilimpahi petunjuk Ilahi,

Allah SWT mencipta alam ini dengan perimbangan untuk ummah dapat nikmati, hidup secara harmoni dengan alam dan makhluk lain ciptaan Ilahi. Seluruh isi bumi, gunung, bukit dan lembah; sungai, tasik, paya, laut dan pantai; hutan, pokok, haiwan dan hidupan liar, diciptakan dengan hikmah yang sangat besar. Orang yang beriman akan melihat alam sebagai tanda kebesaran Ilahi yang wajib dihargai dan dipelihara sebaik-baiknya.

Dukacita hari ini, kerana didorong rasa tamak dan rakus untuk mendapat keuntungan duniawi, manusia semakin lupa diri, lalu tergamak menebang hutan secara haram, membuang bahan beracun ke dalam sungai, melakukan pembakaran secara terbuka dan memusnahkan persekitaran asli hidupan liar. Perbuatan zalim manusia telah membuatkan bumi 'menjerit'; akibatnya berlaku banjir besar, tanah runtuh, cuaca semakin panas, kemarau panjang, udara berjerebu, sungai semakin cetek dan tercemar, hakisan tanah dan hakisan pantai.

Sebahagian bencana yang berlaku pada hari ini, berpunca daripada tangan-tangan manusia yang tidak menjunjung amanah untuk memelihara bumi ciptaan Ilahi dengan adil. Allah SWT telah mengingatkan kita melalui firman-Nya:

﴿وَلَا تُلْسِدُوا فِي الْأَرْضِ بَعْدَ إِصْلَاحِهَا وَادْعُوهُ خَوْفًا وَطَمَعًا إِنَّ رَحْمَتَ اللَّهِ قَرِيبٌ مِّنَ

﴿الْمُحْسِنِينَ﴾



Bermaksud: Dan janganlah pula kamu melakukan kerosakan di atas muka bumi sesudah Allah menyediakan segala yang membawa kebaikan padanya dan berdoalah kepada Nya dengan perasaan bimbang (kalau-kalau tidak diterima) dan dengan perasaan berharap (supaya dimakbulkan). Sesungguhnya rahmat Allah itu dekat dengan orang yang memperbaiki amalannya. (Surah Al-A'raf ayat 56)

Ayat 56 Surah Al-A'raf mengingatkan manusia, bahawa merosakkan alam sekitar ialah perbuatan yang dimurkai Allah SWT.

Jemaah Rahimakumullah;

Perbuatan merosakkan alam sekitar ialah perlakuan jenayah; perbuatan dosa terhadap manusia dan makhluk ciptaan Allah seluruhnya. Pembalakan haram, pencemaran sungai, pemburuan hidupan liar dan pembuangan sisa beracun bukan sekadar melanggar undang-undang negara, bahkan mengkhianati amanah Allah SWT.

Akta Kualiti Alam Sekeliling 1974, memperuntukkan hukuman berat terhadap pelaku jenayah alam sekitar. Walau seberat mana hukuman dunia, insafilah, hukuman Allah SWT di akhirat pasti jauh lebih berat terhadap manusia yang melakukan kerosakan di bumi dan menzalimi kehidupan makhluk ciptaan Ilahi. Sesungguhnya menjaga alam sekitar mampu mendidik jiwa manusia menjadi lebih dekat dengan Allah SWT. Mimbar mengajak para jemaah menghayati tiga pesanan berikut;

Pertama: Menyemai rasa tawaduk dan syukur kepada Allah.

Apabila manusia melihat gunung yang teguh berdiri, lautan yang luas terbentang, sungai yang kaya dengan kehidupan, hujan yang menyuburkan bumi dan tumbuhan yang menghidupkan, lahirkan rasa kagum terhadap kehebatan Allah SWT. Alam mendidik manusia supaya sedar bahawa dirinya hanyalah hamba yang kecil di sisi Allah Yang Maha Agung.

Kedua: Menjamin kesejahteraan dan kesihatan manusia.



Udara dan air yang tercemar membawa pelbagai penyakit kepada manusia dan kemudaratan kepada pelbagai makhluk lain di bumi ini. Islam mengutamakan menjaga nyawa manusia dan kehidupan alam. Oleh itu segala usaha menjaga kebersihan alam adalah selari dengan maqasid syariah.

Ketiga: Mengekalkan keseimbangan kehidupan.

Setiap makhluk ciptaan Ilahi mempunyai hak dan peranan masing-masing. Hidupan liar, tumbuhan dan hutan; gunung, lembah, sungai, paya, tasik, pantai dan laut, saling berkait dalam menjaga keseimbangan alam. Apabila manusia merosakkan satu bahagian alam, akan terjejas keindahan keseimbangan yang Allah ciptakan; dan akan tercetus bencana yang akan menghukum manusia.

Muslimin yang dirahmati Allah,

Sesungguhnya, menjaga alam sekitar sangat bertepatan dengan tuntutan maqasid syariah, yang bertujuan membawa kemaslahatan dan menolak kemudaratan. Insaflah! bumi ini telah diamanahkan oleh Allah SWT kepada kita sebagai khalifah. Penuhilah amanah tersebut dengan menjamin anak cucu kita diwariskan dengan bumi yang kekal indah dan seimbang, tidak dirosakkan, jauh sekali daripada dimusnahkan.

Rasulullah SAW bersabda:

إِنَّ اللَّهَ طَيِّبٌ يُحِبُّ الطَّيِّبَ، نَظِيفٌ يُحِبُّ النَّظَافَةَ، كَرِيمٌ يُحِبُّ الْكِرَامَ جَوَادٌ يُحِبُّ الْجُودَ
فَنَظَّفُوا أَرَاهُ قَالَ أَفْنَيْتَكُمْ وَلَا تَشَبَّهُوا بِالْيَهُودِ

Bermaksud: Sesungguhnya Allah SWT itu baik, Dia menyukai kebaikan. Allah itu bersih, Dia menyukai kebersihan. Allah itu mulia, Dia menyukai kemuliaan. Allah itu dermawan, Dia menyukai kedermawanan, maka bersihkanlah olehmu tempat-tempatmu dan janganlah kamu menyerupai Yahudi. (Hadis Riwayat al-Tirmizi)

Dalam hasrat membantu menjaga alam sekitar, mimbar menyeru kepada lima pendekatan berikut;



Pertama: Masjid berada di barisan hadapan merintis usaha menyedarkan ahli kariah untuk mengamalkan budaya kitar semula, dan masjid-masjid menjadi pusat program kitar semula.

Kedua: Hindari perbuatan pembakaran terbuka yang mencemarkan udara dan menambahkan suhu panas bumi.

Ketiga: Tidak mencemarkan sungai, pantai dan kawasan awam dengan sampah sarap terutama buangan bahan plastik.

Keempat: Mendidik anak-anak sejak kecil lagi untuk mengamalkan budaya menghargai dan mencintai alam.

Kelima: Jadikanlah alam ini sebagai tempat mengambil ibrah tentang kebesaran Allah SWT sehingga bertambah keimanan dan rasa pengabdian kepada-Nya.

بَارِكْ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلْ
مَنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ
وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ
إِنَّهُ هُوَ الْغَفُورُ الرَّحِيمُ.



Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, serta para ulama yang muktabar meliputi aliran *Asya'irah* dan *Maturidiyyah*. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.
اللَّهُمَّ أَعِزِّ الْإِسْلَامَ وَالْمُسْلِمِينَ وَأَنْصُرْ إِخْوَانَنَا وَأَخَوَاتِنَا وَأَطْفَالَنَا فِي فِلَسْطِينَ، وَاحْفَظْ أَهْلَهَا وَأَنْصُرْ جُنُودَهَا وَدَمِّرْ أَعْدَائِكَ أَعْدَاءَ الدِّينِ يَا رَبَّ الْعَالَمِينَ.

Ya Allah Ya Rabbal 'alamin, Kami pohon daripada Mu rezeki yang halal lagi berkat. Jauhkan kami, keluarga kami, dan seluruh umat Islam daripada harta yang haram dan syubhah. Jauhkan hati kami daripada sifat tamak, serta tetapkan kami berada di atas jalan yang Engkau redha.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



Ya Mannan Ya Razzaq, berkatilah hamba Mu yang melaksanakan zakat, wakaf dan sedekah. Kurniai mereka rezeki berlipat ganda, sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Mu'min Ya Muhaimin, Jauhi kami daripada kemurkaan Mu; jauhi kami daripada termasuk dalam kalangan orang-orang yang terhalang mendapat nikmat Mu; jauhi kami daripada kesengsaraan, bencana dan malapetaka. Jauhi kami daripada kejahilan dan kezaliman. Limpahi rahmat Mu agar negara kami berada dalam keadaan selamat dan makmur, rakyatnya hidup dalam suasana aman dan muhibah.

Ya Malikul Mulk, Lantiklah untuk urusan kami, orang-orang yang terbaik dalam kalangan kami. Jangan Engkau lantik untuk urusan kami, orang-orang yang terburuk dalam kalangan kami. Hindari negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah lagi ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Muiz Ya Adzhiim Ya Kabiir, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَىٰ
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.